

德化縣志卷第四十三

知德化縣事

高錫三補輯

鄒文炳再輯  
陳鼐續輯

寓賢

李青蓮有云天地者萬物之逆旅光陰者百代之  
過客如其言人人皆寓賢乎非也生長於斯祖孫  
世籍人不足重冥冥焉而已文章品望經濟才猷  
鄉國榮之既各爲傳志已偶涉歷焉杖履所棲遊  
屐所至時日幾何而他邦之人奕世傳之由斯以  
推君子所居居卽垂不朽耳豈復有寓賢乎邑有

德化縣志

卷四十三人物

寓賢

一

匡廬往往爲高人所托足故志載寓賢視別傳獨  
多釋慧遠東晉禪宗聲傳遠近一時雲侶相從至  
於士夫脫屣夫寓居緣於釋氏誠高隱之過然而  
招使來者則其誠足以動矣賓視其主生斯地者  
勉焉客遊因而竝志天地光陰豈有盡乎不然悲  
逆旅者非逆旅也傷過客者非過客也志寓賢

晉

高悝廣陵人少孤事母以孝聞時年一十三歲值歲饑饉  
悝菜蔬不饜每致肥甘於母撫養幼弟以友愛稱寓居

江州刺史華軼辟爲西曹書佐

府志

周邵字子南與南陽翟湯隱於廬山庾亮臨江州聞翟周之風束帶躡履而詣焉邵聞庾至轉避之亮復密往值邵彈烏於林因前與語還云此人可起乃拔爲鎮蠻護

軍西陽太守

尋陽記

周續之字道祖其先鴈門廣武人也過江居豫章建昌縣八歲喪母哀戚過於成人奉兄如父年十二從豫章太守范甯受業通五經竝緯候號曰顏子旣而閒居讀老易入廬山事沙門釋慧遠布衣蔬食終身不娶辟撫軍

德化縣志

卷四十三人物

寓賢

二

叅軍徵太學博士竝不就江州刺史劉柳薦之辟爲太尉掾不就宋高祖鎮彭城遣使迎之禮賜甚厚每稱之日心無偏吝眞高士也旣踐位迎至京師爲開館東郭門外數幸問時號通隱

府志

劉程之彭城聚里人也字仲思宋高祖號之日遺民少孤事母以孝聞體貌冲遠虛心方外周覽百氏得老莊要旨邁往自負不靡於俗雖餒瘠在躬鋸斧當前意湛如也嘗爲柴桑令已乃棄之入匡山依釋慧遠居西林北澗上力辭薦辟專心禪思安貧守素研極幽眇云

同上

宗炳字少文南陽涅陽人也性至孝居喪過禮爲鄉閭所稱刺史殷仲堪桓元竝辟主簿舉秀才宋高祖辟主簿及太尉叅軍俱不就而東下入廬山與釋慧遠居久之還江陵三湖已而二兄卒孤累甚衆家貧頗營稼穡高祖數致餼賚皆受不辭其後子弟從祿乃悉辭不受焉高祖辟太尉掾太子舍人通直郎太子中舍人竝不應悉圖所游諸山水於室壁而曰老疾俱至名山恐難徧睹唯當澄懷觀道卧以遊之耳又曰撫懷動操欲令衆山皆響元嘉二十年卒衡陽王義季與江夏王義恭書

德化縣志

卷四十三人物

寓賢

三

曰宗處士不救所病其清履肥素終始可嘉爲之惻愴不能已已

同上

雷次宗字仲倫南昌人也博學明詩禮不就徵辟立館東林與慧遠居宋文帝元嘉十五年徵至京師立學雞籠山數幸問資給甚厚除給事中不就久之還廬山二十五年詔曰前新除給事中雷次宗經明行修自絕詔命宜加申引以旌退素可散騎常侍又不就再徵至京師築室鐘山廬曰招隱猶秉昔操不入公門每自華林入延賢堂爲太子諸王講喪服經

同上

齊

宗測炳之孫炳在廬山時有宅在東林寺側已而東還其後劉宋時測亦自都下來居之魚復侯蕭子響爲江州厚贈遺之測曰少有狂疾尋山採藥遠來至此量力而進松木度形而衣薜蘿盎然已足豈容當此橫施

同上

梁

史叔明吳興烏程縣人吳太史慈後也少善莊老兼通孝經論語禮記尤精三元每講說聽者常五百餘人爲國子助教邵陵王綸好其學及出爲江州攜叔明之鎮王

德化縣志

卷四十三人物

寓賢

四

遷郢州又隨府所至輒講授故江州人士皆傳其學

同上

張孝秀字文逸南陽宛人也爲安成王別駕頃之去居於

東林寺性通率常冠縠皮巾躡蒲履執棕櫚皮麈尾服

寒食散盛冬能卧石上普通三年卒室中皆聞有非常

香氣梁太宗甚傷悼之與劉慧斐書述其貞白云

同上

劉慧斐字文宣彭城人博學能屬文起家安成王法曹行叅軍隱居東林寺構園山北號離垢時謂之離垢先生

同上

陳

張正見字見頤清河東武城人梁元帝立拜通直散騎侍郎遷彭澤令 梁季喪亂避地於匡俗山高祖受禪詔還都除鎮東鄱陽王府墨曹行叅軍歷宜都王限外記室撰史著士帶尋陽郡丞累遷尚書度支郎通直散騎侍郎著士如故有集十四卷

陳書

唐

李白字太白興聖皇帝九世孫也其先以罪徙西域神龍初遁還客巴西旣長隱岷山蘇頲異之曰子才可比相如天寶初入會稽與吳筠善筠被召故白亦至長安賀

德化縣志

卷四十三人物

寓賢

五

知章見其文歎曰子謫仙人也言於明皇帝召見論當世事奏頌一篇帝賜食親爲調羹有詔供奉翰林嘗侍帝醉使高力士脫靴力士耻之摘其詩以激貴妃帝欲官白妃輒沮止白乞歸帝賜金放還安祿山反轉側宿松匡廬間永王璘辟爲府僚佐璘起兵逃還彭澤璘敗當誅初白遊并州見郭子儀奇之子儀嘗犯法白爲救免至是子儀請解官以贖有詔長流夜郎會赦還潯陽坐事下獄時宋若思將吳兵三千赴河南道潯陽出之辟爲叅謀未幾辭職李陽冰爲當塗令白依之代宗立

以左拾遺召而白已卒

府志

李華字遐叔趙州贊皇人天寶十一載遷監察御史安祿山反上誅守之策皆留不報元宗入蜀百官解竄華母在鄴欲間行輦母以逃爲盜所得僞署鳳閣舍人賊平貶杭州司戶叅軍上元中以左補闕司封員外郎召華喟然曰烏有隳節危親欲荷天子寵乎稱疾不拜李峴領選江南表置幕府卧疾江州其送李侍御序有云方理舟潯陽追迹幽人雖病痼齒衰而神王顛賴之中齊榮辱一視聽是非哀樂無自入矣

豫章書

德化縣志

卷四十三人物

寓賢

六

陳伯宣宜都王叔明之後隱居廬山註司馬遷史記徵詔不起就領著作郎其孫旺因居德安太平鄉六世孫崇爲江州長史治家有法累世同居南唐立義門以旌之

府志

侯高字元覽上谷人少爲道士學黃老煉氣保形之術居廬山號華陽居士與孟郊韓愈李勃李翱相往來達撫爲楚州起攝盱眙祭酒李公遜刺衢州請治信安其觀察浙東又宰於剡三縣皆有政不幸得心疾留其子狗兒於李翱家而歸廬山不到卒於江西

文苑英華

五代

孫晟初名鳳又名忌密州人好學有文辭尤長於詩少爲道士居廬山簡寂宮常畫唐詩人賈島像於屋壁朝夕事之簡寂宮道士惡晟以爲妖驅出之乃儒服北之趙魏謁唐莊宗於鎮州莊宗以晟爲著作佐郎天成中奔吳爲相後使於周世宗召問江南事不對殺之

豫章書

史虛白字畏名北海人也以中原多故隱廬山韓熙載薦之元宗召至便殿訪以國事辭曰漁釣之人安知邦國大計又因醉溺殿上祥爲疏野狀詔勿劾賜田遣歸

府志

德化縣志

卷四十三人物

寓賢

七

楊徽之浦城人與邑人江文蔚詩賦齊名肄業廬山周顯德中以甲科釋褐校書郎集賢校理宰相范質器重之太宗聞其詩名因索所著奏上百篇且獻詩以謝有十年流落今何幸叨遇君王問姓名之句

同上

宋

孔延之字長源孔子四十六代孫五世祖績遷臨江世爲新淦人登慶歷進士九遷至司封郎與周濂溪先生友善光風霽月別有神契兼樂佳山水將卜居於江州卒葬廬山之麓子文仲武仲平仲文名籍甚平仲因廬墓

遂遷居焉

闕里志

宋庠安陸人父杞爲九江掾與其妻鍾禱於廬阜鍾夢道士授以書曰以遺汝子視之小戴禮也已而庠生他日

見許眞君其像與夢中相肖

府志

劉廷式字得之齊州人娶瞽女旣喪不復娶蘇軾深重之後監太平觀遂老於廬山絕粒不食目奕奕有紫光步

上下峻坂如飛以壽終

同上

蘇庠字養直丹陽人丞相頌之族也卜築廬山以琴書自娛與修水李彭齊名世稱蘇李少工詩父伯固從東坡

德化縣志

卷四十三人物

寓賢

八

遊養直屬玉雙飛水滿塘詞見賞於坡稱爲吾家養直紹興間與徐師川同召養直辭師

命造朝便道過

養直留飲甚歡徐奕素高於蘇是

養直拈奕子笑視

師川曰今日還須老夫下此一着師川有愧色

同上

張所青州人登進士爲監察御史靖康中以蠟書冒圍募河北兵士民得書喜曰朝廷棄我猶有一張察院能拔而用之應募者凡七十萬由是所之聲振河北高宗卽位遣所按視陵寢還言曰河東河北天下之根本昨者誤用奸臣之謀始割三鎮繼割兩河其民怨入骨髓若

因而用之可藉以守否則兵民無所繫望陛下之事去矣且請帝亟還京城具言五利奉宗廟保陵寢一也慰安人心二也繫四海之望三也釋河北之疑四也得一意於邊防五也帝欲以其事付所會所言黃潛善奸邪恐害新政潛善引去帝留之乃貶所安置江州上同王庶字子尚慶陽人也以不主和議七疏乞免乃以資政殿學士知潭州歸至九江復命奪職徙家居焉上同李若谷河北人高宗時罷叅政或曰君胡不效楊仲原之泣耶若谷曰卽搥殺我淚亦無自出秦檜聞之大怒謫

德化縣志

卷四十三人物

寓賢

九

居江州

上同

元

吳澄字幼清號草廬崇仁人常仰止濂溪周子過九江訪其遺踪適抱病調攝於濂溪書院如披拂光霽曰勿藥有喜也數月病愈猶低徊不忍去云

明

桑喬字子木揚州人爲御史謫戍潯陽往來廬山遊憩凡諸名勝無不歷覽所著有廬山紀事詞簡而賅志府陳昂字爾瞻莆田人隆萬間避倭難攜妻子客南昌旋愛

廬山旅於九江琵琶亭側以織草履爲業得錢輒沽酒  
或爲人卜凡匡廬幽險處莫不登覽遇商船乞爲傭適  
夜郎登峩峩頂又返九江數年善於詩以王右丞杜工  
部爲高曾詩絕肖之

同上

國朝

王崇擢黃岡人順治乙酉夏挈家舟泊潯陽適左逆陷城  
大掠子禮部尙書澤宏尙諸生孫都察院材任方髻亂  
俱驚竄頃之邑人譚受所糜粟賑饑於譚家坂崇擢父  
子寓焉踰年乃歸崇擢與受所誓昆弟受所沒澤宏題

德化縣志

卷四十三人物

寓賢

十

其墓曰善人